

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Indian Air Force (IAF) tana Lengpui ram lei chungchang CBI chhui turin MNF Legal Board leh Congress Party chuan ngenna an thehlut a, Mizoram Lok Ayukta chhui tir turin thubuai thehluk a ni bawk.
- 2. Chief Minister Pu Lalduhoma kaihhruai Empowered Committee on Investment chuan Mumbai-a inbun FC Tech Energy ten Mizoram plastic hnawm hman tangkai theih siamna hmun din a thuphungin a remti.
- 3. Lok Sabha chuan Voice Vote hmangin President in Parliament-a a thusawi chungchanga lawmthu sawina motion an pass.
- 4. Union Home and Cooperation Minister Amit Shah chuan vawiin khan India rama Cooperative behchhana lirthei hman hawh theih hmasaber Bharat Taxi New Delhi-ah a tlangzarh.

<><><>

MNF

Indian Air Force (IAF) tana Lengpui ram lei chungchang CBI chhui phutin vawiin khan MNF Legal Board leh Congress Party chuan chhuitir tura ngenna an thehlut a, Mizoram Lok Ayukta a chhui tir turin thubuai thehluk a ni bawk.

MNF Party chuan vawiin chawhma khan Chief Secretary Pu Khilli Ram Meena, Chief Vigilance Officer ni bawk hnenah CBI chhuitir tura ngenna an thehlut a, an Vice Chairman Lalpianfela Chawngthu hminga lehkha an thehluk-ah hian MNF Legal Board chuan IAF tana Lengpui rama mimal ram lak danah thil felhlel bakah tun sorkara thuneitu sangte'n pawisa tam tham tak an eiru a puhin CBI chhuitir ngei turin an phut a. Tun sorkar ding lai-in kum 2023 December ni 23 a CBI te a tul ang ang chhui thei tura thuneihna (general consent) a pek chu kum 2024 June ni 27 a a hnuhkir leh tak avangin CBI-te koh luh hi an ngen tih an lehkha thehlukah chuan an tarlang a. CBI kher chhui an ngiatna chhan sawifiahin he thilah hian Chief Minister, Revenue Minister, sorkar officer lian leh politics a thilitthei mimal engemaw zat an inhnamhnawih ni a puhna a awm avangin Mizoram sorkar hnuai a thawkte chhui mai chi ni lova an ngaih thu an tarlang bawk a ni.

MNF Legal Board chuan Lengpui rama mimal ram lakna atana cheng vaibelchhe 188 zet mipui sum hman a nih chungchangah hian tihdan phung felhlel satliah ni lovin tum lawk sa reng leh politics thuneihna hmanga inthuruala dik lo taka thuneihna hman sualna ni-in an puh a ni.

Pu Lalpianfela Chawngthu chuan ZPM Media Committee Chairman hminga CBI a FIR thehluk tumna awm ni a sawi chu tlanchhe chung a mipui bum tumna-ah a puh a. Sorkar kalphung pangngai awm sa hmang ngam lova, rorellai party Media Committee Chairman hminga FIR thehluk chu thil kalphung a ni lo a ti a, CBI chhuitir tumna tak tak ai-in politics thil taka hmai phihfai tumna mai-ah a puh. ZPM sorkar hian MNF Legal Board lehkha thehluk hi bawhzuiin, sorkar kalphung pangngai ngeia CBI te kuta a hlan an beisei a, an umzui zel dawn a ti.

Mizoram Pradesh Congress Committee (MPCC) chuan vawiin chawhnu dar 3 khan IAF-te hnena Lengpui leh Sihphir ram hralh danah thil fel lo a awma an hriat avangin CBI, Aizawl Unit-ah MPCC Action Committee secretary Pu Lalmachhuana leh MPCC general secretary Pu C Dothansanga-te hmangin FIR an thehlut a; MPCC chuan ZPM sorkar chu an sawi ang ngeia CBI hnenah general consent pe turin an ngen.

MPCC Treasurer Dr Lalmalsawma Nghaka chuan tun thla ni 4-a Council of Minister meeting-in IAF-ten Lengpui leh Sihphir ram an lak chungchang an sawihonaah mipuiten thudik an hriat theih nan hemi chungchangah hian CBI koh luh ni se, an ti chu a vanduaithlak hlea an hriat thu an tarlang. MPCC chuan sorkarin Anti Corruption Branch (ACB)-ah police chhuanawm tak tak a nei reng chungin anni ringzo loa, CBI koh luh a ngai an tihnaah hian Home Minister-in a enkawl Home department chungah rinna an nghat zo lo em ni, an ti a; Mizoram sorkar hian a duh a nih chuan ACB kaltlangin heng ram lei leh hralhna a sulsutu bera ngaih Henry Lalremsanga Hlawnmual man tang eitute chu a chhui chhuak thei tih an tarlang.

MPCC chuan ZPM sorkar chu hetiang thil chhuichian ngai tihnuhnawh leh tur si engvanga hmanhmawh taka IAF-in ram hi an neih theihna tura hma la nge an nih tih chu an zawhna a nih thu tarlangin , ZPM sorkar chu an intiam ang ngeia February thla ral hma ngeia CBI hnenah general consent pe leh turin an phut a ni.

Nimin khan Durtlanga cheng Pu Vanlalruata Sailo chuan Lengpui ram hralh chungchang hi chhui turin Mizoram Lok Ayukta ah nimin khan ngenna a thehlut a, Lok Ayukta chuan lo pawmsakin, Inquiry Team hnuaiah Preliminary Inquiry ti tura hmalak nghal ni a thudawn a ni.

(Desk/Hruaia PTC Aizawl)

<><><>

ASSEMBLY SESSION

Tun thla ni 17 atanga tan tur Assembly budget session a hun hman dan tur kimchang chu Speaker kaihhruai Business Advory Committee thukhawm lehin a ngaihtuah tha leh dawn.

Wawiina Assembly inkhawm hun hman dan tur duangtu, Speaker Pu Lalbiakzama kaihhruai Business Advisory Committee (BAC) thukhawm chuan budget session hun hman dan tur tlangpui an duang a. BAC duan dan chuan Pu Lalduhoma'n a wawi 3-na atan Mizoram budget chu a pharh leh dawn a, a hun tur tak hi tihchian leh tur a ni. Budget session ni March ni 12 thleng awh tura ruahman chhin a ni. Assembly inkhawm tan ni February ni 17 chawhma dar 10 leh a chanve-ah larsap Gen. Vijay Kumar Singh chuan kum khata inkhawm hmasa bera tihdan pangngai-in Assembly House chhungah thu a sawi ang a, sorkar hnathawh tawh leh hmachhawpte a sawi ang. Hemi hnu hian Llarsap thusawi chungah lawmthu sawina motion pulutin a tuk February ni 18-ah sawiho a ni ang.

Tun thlengin sorkar atangin dan dinglai siamthatna tur (amendment bill) 5 a lut tawh a. House chhunga chhan chi zawhna (starred question) 749 leh zawhna ziaka chhan chi 287 a lut tawh bawk a, a la luh belh mek zel bawk a ni. Tun tum Assembly pakuana thutkhawm wawi rukna-ah hian mitthi sun tur an awm rih lo niin Assembly Secretariat official-te chuan an sawi a ni.

(Desk/PTC Aizawl)

<><><>

IIMC

Indian Institute of Mass Communication (IIMC), Aizawl chuan 'AI & Media' tih thupuia hmangin wawiin khan an conference hall-ah 'India AI Impact Summit 2026' - Mizoram State Regional Pre Summit Conference an buatsaih a;

Sorkar laipui Ministry of Electronics and Information Technology leh IIT, Bombay te tangkawpa buatsaih a ni a, IIMC Aizawl Regional Director in-charge leh DDK News director ni bawk Pu Nampibou Marinmai an conference hi a hawng.

Pu Nampibou Marinmai chuan summit kaltlanga sawihona leh zirhona hian ram hmasawнна tura AI hman tangkai dan tur tha zawk leh AI chungchang hriat zauna a thlen ngei a beisei thu a sawi.

(BYTE - IIMC Aizawl Regional Director in-charge Pu Nampibou)

Pu Nampibou chuan IIMC Aizawl hi kum 2011 khan tan a ni a, tunah hian kum 10 chuang zet an lo kal ve tawh thu leh he hmun atanga zirchhuakte zingah ram chhung hmun hrang hranga hna thawk engemaw zat an awm tawh thu a sawi a; IIMC Aizawl hian a tirah Post-graduate/Diploma zirna chauh an nei thin a, tunah chuan Master's degree thleng zirna an neih tawh bakah Ph.D course tan turin hma an lak mek thu a sawi bawk.

Summit-ah hian vawiin khan panelist mi 8-in ‘AI & Media’ tih thupui an sawiho a, zirlai kalkhawmte nen sawihona hun leh zawhna leh chhanna hun an hmang a; summit hi naktukah chhunzawma zawh tur niin, AI hmanrua zirho a ni ang.

(CORR-Johnny)

<><><>

CM

Chief Minister Pu Lalduhoma kaihhruai Empowered Committee on Investment vawiina Aizawla thukhawm chuan Mumbai-a inbun FC Tech Energy ten Mizoram plastic hnawm hman tangkai theih siamna hmun din a remti

Empowered Committee on Investment meetingah hian FC Tech Energy chuan Plastic Waste atanga Fuel Cell leh Sustainable Energy an siam dan sawifiahin Mizoramah chutiang hmunpui chu din an duh thu an thlen a. An ram mamawh tur ang te, tui an mamawh zat tur leh Power an mamawh zat tur te an sawi nghal a.

Committee hian a thuphungin FC Tech Energy te dilna hi pawmsak phawt ni se an ti a. Mumbai-a an Plant tlawh a, zirchian ni se an ti. An ram mamawh zat han pek theihna tur laite an sawiho bawk.

Khuanglenga Opickpure Private Limited ten Ginger Processing Unit an sak mek chungchang pawh an thlirho a. Opickpure nen hian Mizoram sorkar chuan nikum khan inremna (MoU) a lo ziak tawh a, company hian cheng vbc 2 leh nuai 50 sengin Processing Unit an sa mek a, an zo tep tawh a ni.

Sorkar chuan Investment & Industrial Policy angin an mamawh thenkhat a siamsak ve mek a. Sorkar hmalakna pawh hi a zo thawkhat tawh a ni.

(DIPR)

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

MOU-BROOM

Sawrkar in hmunphiah lei tura a ruat empanelled buyer Zohandco te chuan nimin khan Vairengte Farmers Cooperative Society te nen inremna ziakin hmunphiah ro kg -ah cheng 80 in an lei tan dawn ani.

Zohandco te leh Vairengte Farmers Cooperative Society te chuan hmunphiah lei turin inremna an ziak a, an inremnaah hian Society lam atangin chairman Pu VL Awmpuian inremna thuthlung hi a sign ani.

An inremnaah hian society mi leh sate hmunphiah nilo chu lei theih ani lovanga chu mai bakah hmunphiah leina sum hi Zohandco te hian Society hnenah an hlan vek anga heta tang hian mi mal hnenah sem chhuah leh tur ani .

Hmunphiah ro hi SCC ah dah luh zel theih ani tawh a hetih lai hian kuthnathawk te chu hmunphiah hring lamah an la insawrbng rih ni a hriat ani.

Kolasib District chhungah hian SCC pahnih Vairengte leh Saipum ah te a awm ani. Inremna ziah fel theih ani ta hi Society lam pawh an lawm hle a an hmunphiah te an pho ro mek zel ani.

(Doreen Vairengte PTC)

<><><>

LOK SABHA ADOPTED MOTION OF THANKS TO PRESIDENT’S ADDRESS

Lok Sabha chuan Voice Vote hmangin President in Parliament-a a thusawi chungchanga lawmthu sawina motion an pass. Puan tawh angin President Murmu-i hian thla hmasa ni 28 khan Parliament in hniha member thukhawm hmaah thu a sawi a. Motion of Thanks hi Union Minister leh BJP MP Sarbananda Sonowal chuan house ah a pulut a. BJP MP Tejasvi Surya chuan a thlawp zui a ni.

Vawiina Motion sawiho leh anih hian Opposition lamin house chhungah nasa takin bengchheng an siam a ni.Bengchheng karah hian President thusawi chungchanga lawmthu sawina motion hi pawm a ni ta a ni.

(Newsonair)

<><><>

BHARAT TAXI

Union Home and Cooperation Minister Amit Shah chuan vawiin khan India rama Cooperative behchhana lirthei hman hawh theih Bharat Taxi New Delhi-ah a tlangzarh. Bharat Taxi hi Multi-State Cooperative Societies Act,2002 hnuaiah ziah luh niin cooperative behchhan lirthei man chawia hman theih a ni a. Thusawiin Union Home Minister Amit Shah-a chuan vawiina an thil hawn chu sawrkarin Taxi sector a luhchilh tihna a ni lo a ti a. Cooperative ten he sector hi an luhchilh ve zawk tihna a ni a ti a. Cooperative taxi hian a khalhtute tan hlawkna tamtak a thlen dawn tih a sawi a. Bharat Taxi ah hian sawrkarin driver te atangin commission engmah a la dawn lo a ti bawk.

(Newsonair)